

Scoticarum lancearum est delusa fragilitas, eductis A gladiis minus decertare tentabant. Sed australes muscae de cavernis pharetrarum ebullientes, et instar densissimæ pluvia convolantes, et in obstantium pectora, vultum, oculos quoque importunius irruentes, conatum illorum plurimum retardabant. Videres ut hericium spinis ita Galwensem sagittis undique circumseptum, nihilominus vibrare gladium, et cæca quadam amentia proruente nunc hostem cædere, nunc inanem aerem cassis ictibus verberare. Et jamjam percussi pavore extremi qui que dissolvebantur in fugam, cum inclitus adolescentis filius regis cum sua superveniens acie in adversum sibi cornu leonina se ferocitate proripuit, ipsaque globi australis parte instar cassis araneæ dissipata, obstantes quosque cædendo ultra regium signum progressus est, ratusque reliquum exercitum secutum iri, ut hostibus fugæ præsidium tolleret, equorum stationem invasit, dispersit, ac retro usque ad duo stadia redire coegit. Hujus igitur admirabili impetu plebs inermis perterrita labebantur. Sed eujusdam prudentis viri segmento, qui caput unius occisi in altum erigens regem clamabat occisum, revocati, vehementius solito irruunt in obstantes. Tunc Galwenses imbrex sagittarum, gladios militum ulterius non sustinentes, fugam ineunt, occisis prius duobus eorum ducibus Wigrico et Dunenaldo. Porro Laodensium cucus primum vix impetum exspectans statim dissolutus est. Tunc rex dissiliens equo, et proceres qui cum eo erant, aduersus hostes processerunt. Sed Scotti ob cæterorum fugam pavidi ex omni lapsi parte regali aciei fugere cœperunt, ita ut in brevi lapsis cæteris pauci circa regem persisterent. Procedit contra eos Anglorum exercitus, ipsum certo regem cum omnibus suis vel occisorum vel capturus, nisi milites regem fugam omnimodis abjurantem, vi sublatum equo regredi compulissent. Tunc hi qui fuderant videntes regale vexillum, quod ad similitudinem draconis figuratum facile agnoscebatur, reverti, scientes regem non cecidisse sed redire, ad ipsum

B reversi terribilem insequentibus cuncum creaverunt. Interea ille adolescentum decus, militum gloria, senum deliciæ, filius regis respiciens retro, vidit se cum paucis in mediis relictum hostibus, vertensque se ad unum de sociis et subridens : *Fecimus, inquit, quod potuimus, et certe quantum in nobis est vicimus. Nunc consilio non minus opus est quam virtute. Nec est aliud majus animi constantis indicium quam in adversa fortuna non frangi, et quando non potes viribus, consilio superes inimicum.* Projectis itaque signis quibus a cæteris diridimur, ipsis nos hostibus inseramus quasi insequentes cum ipsis, donec prætergressi cunctos ad paternum cuneum quem eminus video in suo vigore manentem cedere necessitati, quantocius veniamus. His dictis, calcaribus sonipede urgens medios intersecat hostes, donec anteriores transgressus, mitiori incessu equum elevat. Et ut noveris quam securum in adversis et providum gessit animum, cæteris militibus armorum onera ubiubi projicientibus, optimus juvenis laboris patiens sustinuit, donec ad pauperis eujusdam tugurium veniens, evocato pauperculo, exuit se thorace, projiciensque ad pedes hominis : *Accipe, inquit, vir, quod mihi est oneri, tuæ consulat necessitati.* At rex jam longe processerat, jam ordinate terribiliter incendens ut quosdam de isequentibus capiens, cæteros qui instabant plurimum deterreret ; sicque ad Carleolum usque perveniens, ibi de se jam securus, sed de filio pavidus per biuum nil aliud agens exspectabat. Tertia tandem die diu desideratum sanum et incolumem filium C recepit. Anglorum sane proceres diu insequentes, innumerabiles tam Scottos quam Galwenses interfecerunt, de militibus vero multos cœperunt. De singulis autem partibus singuli milites corruebantur. Sane Anglorum duces omnes sani incolmosque reversi, et circa Walterum Espec, quem ducis et patris loco venerabantur congregati, immensas gratias Deo omnipotenti pro insperata victoria retulerunt.

GENEALOGIA REGUM ANGLORUM.

(TWISDEN ubi supra, pag. 347.)

INCIPIT EPISTOLA ABRATIS RIEVALLENSIS AELREDI AD ILLUSTREM DUCEM H., POSTMODUM ANGLORUM REGEM.

Illustrissimo duci Normannorum et Aquitanorum et comiti Andegavensis HENRICO, frater A., servus servorum Christi qui in Rievalle sunt, salutem et orationes.

Adeo secundum naturam virtus est, vitium contra naturam, ut virtutem laudet et approbet etiam vitiosus, vitium vero, si humanæ rationis sequatur

D judicium, nec vitiosus excuset. Nam et vitium quasi semetipsum ob inuatum sibi turpitudinem erubescens, semper latebras querit et optat secretum : cum econtra virtus suæ sibi pulchritudinis et honestatis conscientia ad omnem tripudiet et exultet aspectum, ob solam humilitatem publicum fugiens et humanum testimonium horrens. Quoniam igitur animæ rationali naturaliter inest amor virtutum, odium vitiorum, quicunque bonis moribus virtutique studuerit, facile sibi omnium illicit et

inclinat affectum. Hinc est, vir illustrissime, quod te multorum qui te oculis non viderunt mentibus impressit fama virtutis, cum admirationi sis universis nec minus delectationi; in tali ætate tanta sapientia, in tantis deliciis tanta continentia, in tantis negotiis tanta providentia, in tali sublimitate talis severitas, in tali severitate talis benignitas.

Quis enim non obstupeat juvenem pro regno certantem abstinere rapinis, cædibus parcere, cavere incendia, nullum gravamen inferre pauperibus, pacem et reverentiam ecclesiis et sacerdotibus conservare? Unde non immerito Andegavensium gloria, Normannorum tutela, spes Anglorum, Aquitanorum decus ab omnibus prædicaris. **H**oc tantum superest, ut Jesum Christum horum munerum largitorem agnoscas et exoptes conservatorem. Ego vero considerans de quorum progenie originem duxeris, gratias [ago] Domino Deo meo quod pro talibus talis nobis filius, quasi novus quidam splendor, illuxit, in quo cum omnium antecessorum virtutes convenerint, maxime tamen in te spiritum Christianissimi regis David gaudeo quievisse; unde divina providentia actum existimo, ut illius mundissimæ manus balteo te cinxerunt militari, per quas Christi gratia virtutem tibi castitatis illius, humilitatis et pietatis infunderet. Quoniam autem recenti morte illius contristatus, vitam ejus et mores sicut nunc amor, nunc timor, nunc spes, nunc dolor meum variant affectum, non historiando, **C** sed l. mentando, brevi stylo collegi, te quasi pietatis illius hæredem intimi cordis dilectione suscipiens, ipsam tibi lamentationem destinare curavi. In qua cum laudabilem ejus vitam et pretiosam legeris mortem, illam imiteris ut ista consequi merearis. Omnis enim laus in fine canitur, nec inchoantibus præmium promittitur, sed perseverantibus datur. Omnipotens Deus conservet in te et augeat gratiam suam, excellentissime et illustrissime domine.

De sancto rege Scotorum David.

Religiosus et pius rex David migravit e mundo; qui, licet dignum tali animæ locum invenerit, mors tamen ejus planctum nobis indicit. Quis enim non lugeat virum tam necessarium mundo, rebus humanis exemptum, nisi is qui rebus humanis pacem invidet et profectum? Rex enim iste mansuetus, rex justus, rex castus, rex humilis, quis facile dixerit, quid utilitatis humanæ vitæ contulerit; quem mansuetudo amabilem, justitia terribilem, castitas compositum, humilitas communem fecerat? Quæ omnia si in privato quolibet laude dignissima judicantur, quanto magis in rege cui potestas dat licere quolibet; cuius vitiis facile faverent inferiores, proni ad imitandum, prompti ad adulandum, cum et impunitas præstet audaciam, libido vero acutat et accendat luxuriam? Scimus enim eum regnum non appetivisse sed horruisse, magisque illud ob alienam necessitatem suscepisse quam

A dominandi libidine victimum avide invasiisse; unde et obsequia illa quæ a gente Scotorum in nova regum promotione more patrio exhibentur ita exhorruit, ut ea vix ab episcopis suspicere cogetur.

Sublimatus vero in regem, nihil superbum in moribus, nihil in verbis crudele, nihil in honestum præferebat in factis, unde tota illa gentis illius barbaries mansuefacta tanta se mox regi benevolentia et humilitate substravit, ut naturalis oblitera sævitiae, legibus quas regia mansuetudo dictabat colla submitteret, et pacem quam eatenus nesciebat grataanter exciperet, unde non immerito dilectus a Deo et hominibus videbatur; dilectus a Deo plane, qui statim in ipsis regni sui initiis ea quæ Dei sunt diligenter exercuit, in ecclesiis construendis, in monasteriis fundandis, quæ et ampliavit possessiōnibus et honoribus cumulavit. Cum enim ipse in toto Scottorum regno tres vel quatuor tantum inventiret episcopos, ecclesiis cæteris sine pastore tam morum quam rerum dispendio fluctuantibus, ipse tam de antiquis quas reparavit, quam de novis quas ipse erexit decedens novem reliquit. Monasteria autem ordinis Cluniacensis, Cisternicensis, Tyronicensis, Aroensis, Præmonstraceensis, Belvicensis, non pauca, non parva, plena fratribus dimisit. Inter quos sic fuerat quasi unus ex ipsis et bona laudans, et si qua minus laudanda emergebant verecundia dissimulans, subtractus omnibus, sollicitus pro omnibus, multa largiens et nihil exigens. O dulcis anima quo abiisti? quo recessisti? Ubi oculi illi pleni pietatis et gratiæ, quibus et congaudere cum gaudientibus et flere cum fletibus (*Rom. xii*) consuevisti?

Vidi ego oculis meis cum aliquando paratus ire venatum pede in scansili posito equum vellet ascendere, ad vocem pauperis audientiam sibi dari postulantis, quod pedem retraxerit, relictoque equo et regressus in aulam, eadem die ad propositum non reversurus, causam pro qua fuerat appellatus benigne et patienter audierit. Consueverat præterea ad ostium aulæ regiæ sedens pauperum et vetularum, quæ certis diebus de singulis quocunque veniebat regionibus vocabantur, causas diligenter audiare, et singulis cum multo saepè labore satisfacere. Num saepè litigabant cum illo, et ipse cum illis, cum ipse nollet contra justitiam personam pauperis accipere, et ipsi nollet rationi quod ostendebat acquiescere. Denique si contingaret ut sacerdos, vel miles, vel monachus, vel dives vel pauper, vel civis vel peregrinus, vel negotiator vel rusticus cum eo haberet sermonem, ita cum singulis de suis negotiis et officiis convenienter et humiliiter disseverebat, ut singulus quisque sua eum tantum curare putaret, et sic omnes jucundos et ædificatos dimitteret. Tactus quippe infirmitate quæ fuerat carne solvendus, feria quarta, id est *xiii* Kalendas Junii, cum intellexisset dissolutionem sui corporis immobile, vocatis familiaribus suis quod de se ipse sen-

tiebat incunctanter exposuit. At illi more humano consolabantur ægrotum, vitam illi et sanitatem penitus promittentes. Sed cum feria sexta morbus ingravesceret, et ei standi simul et incedendi facultatem vis languoris adimeret, accersitis clericis viisque religiosis, Dominici corporis sacramentum sibi dari postulavit. Parantibus illis efferre quod jusserat, prohibuit ille, dicens se ante sacrosanctum altare sacrosancta mysteria percepturum. Igitur clericorum ac militum manibus in oratorium deportatus, post missarum solemnia venerandam sibi crucem, quam nigrum vocant, produci sibi petit adorandum.

Est autem crux illa longitudinem habens palmæ de auro purissimo mirabili opere fabricata, quæ in modum thecæ clauditur et aperitur. Cernitur in ea quædam Dominicæ crucis portio (sicut sæpe multorum miraculorum argumento probatum est), Salvatoris nostri imaginem habens de ebore densissime sculptam, et aureis distinctionibus mirabiliter decoratam. Hanc religiosa regina Margareta, bujus regis mater, quæ de semine regio Anglorum et Hungariorum exstitit oriunda, allatam in Scotia quasi munus hæreditarium transmisit ad filios. Hanc igitur crucem omni Scotorum genti non minus terriblem quam amabilem cum rex devotissime adorasset, cum multis lacrymis peccatorum confessione præmissa, exitum suum cœlestium mysteriorum perceptione munivit. Deinde relatus in thalamum, vénientibus sacerdotibus ut sacræ unctionis sacramenta complerent, assurrexit ut potuit, ac de lectulo in terram se dejiciens, salutare illud officium cum tanta devotione suscepit, ut clericos paulo fessinantis psallentes, manu simul ac sermone compesceret, singulis verbis ipse intenderet, ipse singulis orationibus responderet. Omnibus igitur rite peractis, cum maxima carnis ac mentis quiete diem exspectavit extreum, suos diligenter obtestans quatenus mox ut ipse decederet mortem suam omnibus propalarent. Quanto citius enim, inquit, mors mea innotuerit, tanto citius amicorum meorum beneficiis aliquid mihi consolationis pietas divina præstabit. In hac ei devotione dies clauditur, cui sequentem in magna tranquillitate continuavit et noctem.

Die autem Dominica quæ Christi ascensionem præcedebat, id est Kal. Junii illucescente, cum sole noctis tenebras emergens radiis suæ lucis abi- geret, ipse a corporis tenebris ad veræ lucis gaudia commigravit, cum tanta tranquillitate ut vide- retur non obliisse sed obdormisse, cum tanta devo- tione ut inventus sit utrasque manus junctas simul supra pectus suum versus cœlum erexisse. Subvenite, sancti Dei; occurrite, angeli Domini, suscipite uniuersam vestro dignam consortio, collocate eam in sinu Abrahæ cum Lazaro, quem non despexit sed sovit, cum sanctis apostolis et martyribus, quo- rum memorias diligenter extruxit et coluit, cum Christi sacerdotibus et confessoribus quos in suis

A successoribus et basilicis veneratus est, cum sanctis virginibus quarum pudicitiam imitatus est, cum mundi contemptoribus quos sibi mammona iniquitatis constituit, quibus se Christi nomine cum omni humilitate substravit. Adsit ei illa misericordiae mater, quæ quanto cæteris constat esse potentior, tanto ipsis pietas sit efficacior! Ego autem, licet peccator et indignus, memor tamen beneficiorum tuorum, dulcissime domine et amice, quæ mihi ab ineunte ætate mes impendisti, memor gratiæ in qua me nunc ultimo suscepisti, memor benevolentiae qua me in omnibus petitionibus exaudiisti, menor munificentie quam exhibuisti, memor amplexuum et oscularum in quibus me non sine lacrymis omnibus qui aderant admirantibus dimisisti, libo et B pro te lacrymas meas resolvo, affectum meum et totum spiritum meum refundo. Hoc pro te Deo meo sacrificium offero. Hanc beneficis tuis vicissitudinem rependo. Et quia hoc minimum est, ibi mens mea ex intimis medullis tui recordabitur, ubi pro salute omnium Patri quotidie Filius immolatur.

De genealogia regum Angliae, et regis David Scotiæ.

Quoniam de optimis moribus religiosi regis David pauca descripsimus, dignum duxi genealogiam, quæ et tua est, dux illustrissime Henrice, breviter veraciterque subtexere, ut cum videris quanta fuerit antecessorum tuorum probitas, qualis in eis virtus inuituerit, qualis splenduerit pietas, agnoscas etiam quæ naturale tibi sit abundare deditiis, florere virtutibus, victoriis illustrari, et quod his omnibus præstat, Christiana religione et justitiæ prærogativa fulgere. Est enim ad optimos mores obtinendos maximum incentivum, scire se ab optimis quibusque nobilitatem sanguinis meruisse, cum ingenuum animum semper pudeat in gloria progenie degenerem inveniri, et contra rerum sit naturam de bona radice fructus malos pullulare. Sicut igitur in veracissimis et antiquissimis historiis vel chronicis potui reperi, a te ipso, virorum clarissime, exordium sumens, et per gloriosissimam matrem tuam aviamque clarissimam ascendens breviter usque ad ipsuni Adam, patrem cunctorum inmortaliū lineam tibi tuæ cognationis ostendam, ut postmodum omissis antiquissimis quorum historias vetustas ipsa delevit, per excellentiores Angliae reges, eorum sublimiora quæque gesta summatis tangendo redeamus, ut, cum videris tantam eorum gloriam morte ac vetustate perisse, eosque pro vita meritis cœlestè præmium quod perire non potest meruisse, discas semper divitiis gloriæque mundi præferre justitiam, ut post vitam temporalem pervenias ad æternam. Amen.

Tu igitur, vir optime, filius es gloriosissimæ imperatricis Mathildis, cuius fuit mater christianissima et excellentissima Anglorum regina, Mathilda filia sanctissimæ feminæ reginæ Scotorum Margaretae, quæ nominis sui splendori morum sanctitatem

tem prælerebat. Hujus pater Edwardus, qui fuit filius Edinundi regis invictissimi, cuius pater Edelred, cuius pater Aedgarus pacificus, cuius pater Eadmundus, cuius pater Edwardus senior, cuius pater nobilis Aluredus, qui fuit filius Adelwif regis, qui fuit regis Egbrichti, cuius pater Alchmundenus, cuius pater Effa, cuius Eppa, cuius pater Ingles, cuius frater fuit famosissimus rex Ine nomine, quorum pater Ceonred, qui fuit filius Ceolwald, qui fuit Cutba, qui fuit Cuthwine, qui fuit Chealin, qui Cheuric, qui fuit Creoda, qui fuit Geordic, qui fuit Elesa, qui fuit Eda, qui fuit Gewis. Iste fuit caput gentis sive, a quo et tota gens illa nomen accepit. Hujus pater fuit Wig, cuius pater fuit Frewine, cuius pater Freodgar, cuius pater Brand, cuius pater Bealdag, cuius pater Woden. Qui fuit filius Fredewald, qui fuit Freolof, qui fuit Frederewlf, qui fuit Fingondwlf, qui fuit Geta, qui fuit Gearwa, qui fuit Beau, qui fuit Geldwa, qui fuit Heremod, qui fuit Itermod, qui fuit Hathbra, qui fuit Wala, qui fuit Beadwig, qui fuit Sem, cuius pater Noe, cuius pater Lamech, cuius pater Mathusale, cuius pater Enoch, qui fuit filius Malaleel, qui fuit Cainan, qui fuit Enos, qui fuit Seth, qui fuit filius Adam patris omnium.

Seth natus est pro Abel quem occidit Cain (Gen. iv). Sicut autem in Abel Christi passio, ita et in Seth Christi est resurrectio figurata. Seth enim Hebraicum nomen est, et lingua Latina dicitur *resurrectione*. Ab hoc igitur Seth ducitur generatio usque ad Enoch, qui vivus a Domino translatus cum sancto Elia, Antichristi præstolatur adventum. Inde venitur ad Noe, qui solus cum filiis et uxoribus meruit mundo pereunte salvari, cuius primogenitus Sem a patre meruit benedici. Dicunt Judæi hunc fuisse sacerdotem summi Dei, et postea Melchisedech fuisse vocatum, qui in figura sacerdotii nostri panem offerebat et vinum, unde in psalmis Christo dicitur : *Tu es sacerdos in æternum secundum ordinem Melchisedech* (Psalm. cix). Ab isto igitur Sem genealogia ducitur usque ad Woden, qui tantæ auctoritatis fuit apud suos, ut seriam quartam quam Romani gentiles diem Mercurii appellabant, ejus nomini consecrarent; quæ consuetudo ab Anglis hodie servatur, vocant enim eundem diem Wodensdei, id est diem Woden.

Porro a Woden linea cognationis tuæ tenditur usque ad Getam, qui et ipse tantæ sapientiae et virtutis habitus est, ut a paganis pro Deo coleretur. Unde proceditur ad christianissimos reges Angliae, Ingles et Ine. Quorum Ine cum potentissimus regum Angliae esset, relicto regno, peregrinus profectus est Romanum, ibique feliciter peregrinans, tandem ad cœlestem mansionem felicius concendit. Ab Ingles vero linea cognationis tuæ tenditur usque ad Ebrichtum, qui tantæ fuit probitatis, ut universam Angliam ex Australi parte Humbræ, quæ pluribus regibus eatenus divisa subjacerat, suo subiungaret

A imperio, et ita primus omnium monarcha Angliae diceretur.

De edelwifo reye.

Cujus filius fuit Edelwif, futuri certe generis sui splendissimum caput, et de qua sanctissimi fructus virarentur pretiosissima radix. Hic in regno terreno semper meditabatur cœleste, ut manifeste daretur intelligi eum non victimum cupiditate, sed charitate provocatum, alienæ necessitatì regnando consulere, non suæ voluntati dominando satisfacere. Erat enim pater orphanorum et judex viduarum, ecclesiarum defensor, propagator monasteriorum. Eleemosynis sane sic operam dabat ut totam terram suam pro Christo decimaret, et partem decimam per ecclesias monasteriaque divideret. Tandem cum multo apparatu Romanum profectus, integro anno ibi perendinavit, loca sancta frequentans, vigiliis et orationibus vacans, eleemosynas multas pauperibus erogans. Sed et ecclesiis beatissimorum Petri et Pauli, ipsique summo pontifici pro regia munificentia plurima largitus est munera. Et sie cum multarum virtutum stipendiis reversus in Angliam, post biennium regnum inter filios sapienter divisit. Per singula territoria sua pauperes alendos ac vestiendos distribuit, thesauros suos misericorditer dispersit et dedit pauperibus (Psalm. cxii); ex quibus non modicam portionem ecclesiis apostolorum Romæ et summæ sedis episcopo delegavit, et sic in senectute bona collectus est ad patres suos, regnum certe non amittens sed mutans, temporale deserens et æternum adipiscens.

De piissimo rege Alfredo.

Cujus filius fuit illud Anglorum decus, regum gemma, virtutum exemplar Aluredus, cæteris fratribus suis junior æstate, sed annosior virtute, unde et a patre plus cunctis fratribus amabatur, ob morum scilicet suorum similitudinem, et spiritualis cuiusdam gratiae privilegium quæ in eo adhuc puero mirabiliter resulgebant. Unde cum pater cum adhuc puerulus esset, cum multis militibus maximisque donariis Romanum misit, ut sanctissimorum apostolorum precibus commendaretur, et a summo pontifice benediceretur; venerabilis autem summus sacerdos Leo qui tunc Ecclesiæ Romanae præfuit, vultum et statum pueri contemplatus, cum in eo divinæ presentiam majestatis scintillantium virtutum indicis persensisset, tempus et ætatem regnandi regiae unctionis sacramento præveniens, sicut quondam Samuel puerum David, ita eum in regem sanctissimus præsul devotissime consecravit. Verum postmodum cum patre Romanum repetens, paternorum honorum in oīnnibus cooperator et adjutor esse promeruit. Hic ab ipsa pene infantia sua legere et discere dulce habuit, circa ecclesias assiduus, in orationibus frequentissimus, obediens parentibus, sociis humilis ac devotus. Ita meditabatur in ætate puerili quod senex devotus impleret. Denique portionem psalterii in qua maxime delectabatur parvo volumine scriptam in sinu semper circumferebat,

ut quoa pectus illud interius ruminabat, ab exte-
rioris sui hominis pectore recederet.

Cum vero post mortem fratrum suorum, cum quibus aliquo tempore regnavit, ad eum totum regnum hæreditario jure transisset, sublimior omnibus factus est omnium servus, ut posset dicere cum Propheta : *Exaltatus autem humiliatus sum, et non sum confusus* (*Psal. LXXXVII*). Ita se bonis amabilis, impiis terribilem, ecclesiarum ministris pavidum, amicis et sociis jucundum, pauperibus mitem et largum exhibuit, ut videretur omnium hominum moribus ac naturæ congruere, omnibus utilis ac necessarius esse. Et quod nunc raro invenitur in terris, illam maximam regis creditit dignitatem, nullam in ecclesiis Christi habere potestatem. *Illa*, inquit, *regnantis dignitas si se in regno Christi quæ est ecclesia, non regem sed civem cognoscat, si non in sacerdotes legibus dominetur, sed Christi legibus quas promulgaverunt sacerdotes humiliiter subjiciatur*. Porro Constantini imperatoris piissimi imitabatur exemplum, qui, cum urbi præfuisset et erbi, ad Christi fidem conversus tantam sacerdotibus reverentiam exhibebat, ut, cum ad eum aliquando episcopi scriptas chartulis querimonia adversus invicem detulissent, convolvens eas in sinu jusserit igne consumi. *Non est meum, inquiens, de sacerdotibus judicare, vocansque episcopos*, inquit : *Patres sanctissimi, nolite judicio contendere, præsertim apud nos, de quorum erratis vestrum est judicare. Sed si quid inter vos ortum fuerit quæstionis, modeste tractetur in ecclesia, ne aliquid quod vestram sanctitatem dedebeat ad eorum qui foris sunt notitiam transferatur. Ego queam certe si de ordine vestro cernerem cum muliere peccantem, proprio eos pallio operirem ne qua religioni vestrae impiis detrahendi daretur occasio*. Hujus itaque aliorumque regum sanctorum beatus Aluredus secutus exemplum, ipsius mundi principis adversum se provocavit invidiam. Deinde sicut quondam sanctum Job (*cap. i*), ita hunc Satan petit ad tentandum : *Nunquid, inquiens, Aluredus frustra colit Deum?* Et Dominus ad eum : *Ecce in manu tua sunt cuncta quæ possidet, tantum ne in eum extendas manum tuam*.

Egressus itaque Satan a facie Domini immisit ei inimicos pessimos, Dacos scilicet et Friones, a fide Christi alienos ; qui cum multa classe venientes in Angliam, maximam regni portionem rapinis, incendiisque consumunt. Quos cum rex strenuissimus sepius repulisset, permissi sunt tandem prævalere, totamque in tantum occupare provinciam, ut rex Christianissimus fuga sibi consulens, exutus regno cum paucissimis familiarium suorum in silvis ac paludibus delitesceret, ac suam suorumque vitam piscium capture transigeret. In omnibus his non peccavit Aluredus labii suis, nec stultum quid contra Deum locutus est. Nec tantum tristabatur quod regnum amiserat, quantum gratulabatur quod vacandi Deo tempus congruum et locum opportu-

A num invenerat. Sed hactenus Christi miles fuerat comprobandus. Quadam igitur die cum sociis in præda piscium occupatis, in tuguriunculo residens meditaretur in lege Dei, hymnisque Davidicis proscriptionis suæ solaretur injuriam, adfuit quidam in habitu peregrino vir venerandi vultu stipem humiliter petens. At rex ut erat vultu hilaris animoque jucundus, utrasque ad cœlum erigens manus : *Gratias, inquit, Deo, qui pauperem suum in paupere visitavit, qui, licet dum omnibus affuenter, et non im properat, dignatur tamen et quod dedit exigere, et quod exegerit restituere cum usura*. Sed quid ageres servus Dei ? Nihil præter unum panem et in amphora vini modicum habebat; vocat itaque ministerium, et *Heus !* inquit, o puer, quid faciemus ? **B** Christus adest, qui quondam thesauros regios in suis pauperibus visitabat, hujus paniculi nostri poculique parvissimi non deditur angustias. Frange itaque, cito frange esurienti panem istum et vinum divide ; totius virtus nostri partem medium Christus accipiat, mihi ac familiolæ meæ pars media reservetur. Gratias egit regiae munificentiae pauper, nullumque paludibus impressum relinquens vestigium, vel discessit vel evanuit.

Inventus in conclavi panis integer, vinique in amphora pristina quantitas regem erigit in stuporem, cum ecce hi qui piscatum ierant redeentes, tantam piscium multitudinem attulerunt, ut præcedens miraculum sequentis magnitudine augeretur. Sequenti nocte cum psalmis et orationibus ac salubri meditatione vigilias protelasset, in somnum tandem resolutus, videt virum prope assistere, facie splendidissima, nigro capillo, oculis lucentibus, quem pontificalia illustrabant insignia, librum auro gemmisque fulgentem in pectore præferentem. Qui cum ei de diligendo Deum, de servanda justitia, de misericordia in pauperes, de reverentia in sacerdotes monita sacra dedisset, ipse iterum adjecit : *Patientiam tuam, o mi Alurede, Christus ex alto prospiciens, laboribus tuis et ærumnis finem impausit. Mane itaque facto cum ad proximum navigaveris littus, cornuque proprio ter insonueris, aderunt tibi forces auxiliarii de amicis tuis optimis, quorum consilio cum reliquum exercitum congregaveris, aggredere hostes, victoria sine dubio illustrandus. Sic Sanctus.*

D At rex, palpitantibus oculis, in eum respiciens : *Quisnam es tu, inquit, o beatissime, qui exsuli huius tam boni nuntii bajulus advenisti ?* Et sanctus : *Cuthbertus, ait, vocor Lindisfarnensis quondam episcopus, tui tuæque gentis curam gerens : cui die hesterna in tuæ mentis propositum devotionemque probarem, tuum hospitiolum visitanti panem vinumque, totum scilicet victimum tuum, misericorditer divisisti. Scias igitur te tuosque filios, me patrocinante, si tamen ambulaveritis in viis Domini, totius Anglicæ monarchiam obtenturos. Memento autem mei cum bene tibi fuerit. Et, his dictis, lux cum loquente disparuit. Mane autem cum amicorum occursu, reliqui quoque exercitus qui sequebatur adventu,*

rex nocturnæ promissionis sensisset effectum, post amplexus et oscula et fusas super invicem lacrymas, rex in medio stans tali oratione suum animavit exercitum :

Gratias agō Deo meo, commilitones, qui non amovit orationem meam et misericordiam suam a me. Ipse enim percutit et sanat, mortificat et vivificat, pauperem facit et ditat, humiliat et sublevat, ipse Dominus faciens pacem et creans malum, ipse Dominus faciens omnia hæc; hactenus pro peccatis nostris flagellans flagellavit nos Deus, sed morti non tradidit nos. Respergit iterum in orationem humilium et non sprevit precem eorum. Ecce illo miserante reliquiæ Anglorum salvæ fient. Quis dubitet? Quis nos de tot latibulis evocavit, de tot regionibus congregavit, et inter paganorum frementes copias timore deposito ad hoc colloquium quosdam singulatum, quosdam cum sociis venire coagit? Agnoscite ergo quia hostes nostri conturbati sunt et commoti sunt, tremor apprehendit eos. Non enim in virtute sua aut fortitudine manuum suarum prævaluerunt super nos, sed dextera Dei et virga furoris ejus non tam in nos quam in nostra peccata deserviens, paganorum usus est crudelitate, in purgationem et non in destructionem. Ecce iterum oculi Domini super nos, et aures ejus ad preces nostras. Viriliter proinde agite et confortetur cor vestrum, quoniam secundum multitudinem dolorum nostrorum quos hactenus persippi sumus, consolationes ejus læticabunt animas nostras. Cogitate, qui adversum quos, qua ratione, qua insuper necessitate pugnamus. Christiani contra paganos, pii contra impios, contra superbos, contriti corde et humiles spiritu dimicamus. Et qua ratione. Ecclesiæ certe destruxerunt, altaria suffoderunt, non ætati, non ordini, non denique sexui perciperunt. Præterea non aliena petimus, sed nostra repelimus. Nostra nobis eripuerunt, nostra possident, nostra luxuriose consumunt, nostra in idolorum suorum sacrificiis expendunt. Certe si necessitatem quæris pugnandi, audi breviter. Ne ulterius gentes Christiano nomini irreverenter insultent, ne Deo vero idola præferant, ne quod nostris peccatis exigentibus de nostris toties victoriæ reportarunt, dæmonum quos colunt virtuti ascribant. Postremo ne diripiatur uxores nostræ, ne captiventur filii, ne virgines violentur, ne impii et perversi totam Anglorum nobilitatem ad degenerem transferant servitatem. Quoniam igitur suscepimus de manu Domini duplia pro omnibus peccatis nostris jam probati, jam examinati, jam purgati congregiamur secure, cum nobis sit et fides certior et causa justior, quos Christus invitat, quos pietas provocat, quos urget necessitas, quibus Christus adest, quibus favent angelii, quibus sancti præsto sunt, quibus de cælo oracula divina resultant.

Hæc cum dixisset, nocturnæ visionis cunctis auditibus retexit oraculum. Quo audio, acclamavit populus : *Dominus dabit virtutem et fortitudinem plebi suæ, benedictus Deus. Statimque corre-*

*A*ptis armis in hostes ruit. Et mox sicut fluit cera facie ignis, sic perierunt pagani a facie Dei. Sternuntur, fugantur, dissipantur. Relictoque nominatissimo vexillo suo quod, quia dæmoniaco instinctu corvina effigie deformaverant, Raven vocabant : quotquot manus consequentium evadere potuerunt silvarum quæsiere latibula. Ab illa die deinceps erat Aluredus vir in cunctis prospere agens, quoniam Dominus erat cum illo, et omnia opera ejus dirigebat, donec fugatis hostibus vel subactis requiesceret terra post Dominum et post Aluredum servum ejus. In diebus autem pacis non otio torpuit, aut vanis spectaculis otiosissime discursibus tempus perdidit, sed legere, et scribere, et sacros apices in linguam Anglicam vertere laborabat. Exstant parabolæ ejus plurimum habentes ædificationis, sed et venustatis et jucunditatis. Leges Christianissimas et scripsit et promulgavit, in quibus fides ejus et devotio in Deum, sollicitudo in subditos, misericordia in pauperes, justitia circa omnes cunctis legentibus patet. In restaurandis ecclesiis quas impia manus everterat, in reparandis, ditandis, ornandis monasteriis desudabat. Inter quæ duo nobilissima monasteria, unum monachis in loco qui dicitur Edelingheie, alterum feminis in civitate quæ Scettebprig dicitur, multis sumptibus condidit, multis possessionibus ditavit, multis donariis adornavit. Per maximam præterea curam gerebat, ne a vicecomitibus et ministris pauperes opprimerentur, et indebitis exactionibus gravarentur. Undo celebre factum est nomen ejus per universum orbem, etiam in magna urbe Roma; quippe qui donaria multa ac largissimas eleemosynas sæpe mittebat apostolorum ecclesiis et ipsi summo pontifici. Summus vero pontifex tantam devotionem gratariter amplectens, piis precibus ejus inclinatus scholam Saxonum ab omni tributo et telonio absolvit. Sed et donaria plurima, insuper et partem ligni Dominicæ regi transmisit. Audiens etiam famam ejus Jerosolymitanus patriarcha, et ipse regem pretiosis exeniis muneravit. Sane de annuo censu qui ei pendebatur justissima distributione ordinavit, ut pars tertia bellatorum deputaretur stipendiis, pars tertia in mercedem et victum operariis cederet, pars vero tertia regiis muneribus quæ munificissime advenientibus tam divitibus quam pauperibus largiri consueverat, servaretur. Qualiter autem sui meminerit peregrini, Dunelmensis ecclesiæ libertas et possessio hodieque demonstrat. Rex igitur Aluredus cum regnasset novem et viginti annis et mensibus sex, de regno terreno ad regnum cœlestis transcendit : AEdwardum solum suum, regni mortuorumque suorum relinquens haeredem.

De rege Edwardo seniori.

Erat autem in scientia literarum patre minor, sanctitate vero non multum inferior, sed superior potestate. Multo enim latius quam pater regni sui fines dilatavit, urbes et novas condidit, et dirutas renovavit. Irpiissimam Dacorum gentem quam

pater ejus non expulerat, rebellantem sibi multis contritam præliis vel fugavit penitus, vel misera servitute compressit, et insulæ faciem in antiquæ pulchritudinis speciem reformavit. Adjectit etiam decoris plurimum soror regis Aelreda, sexu quidem femina, sed animo ac virtute plus viro, quæ exceptis his quas rex seculicaverat urbes construxit, Brunesburch, Bruge, Scorgate, Thamewrhe, Swafford, Edebirath, Werewicum, Ciresbirith, Warebirich, Runconere, Liecestre. Ipsa pugnavit contra Walenses et vicit, et Derebi expugnavit et cepit. Tantaque fortitudine emicuit, ut a pluribus rex diceretur. Igitur rex Edwardus, vir mansuetus et pius, omnibus amabilis et affabilis, adeo omnium in se provocabat affectum, ut Scotti, Cumbri, Walenses, Northumbri, et qui remanserant Daci, eum non tam in dominum et regem quam in patrem eum omni devotione eligerent. Tanta debet modestia regebat subditos, tanta justitia inter proximum et proximum judicabat, ut contra veritatem noa dico nihil velle, sed nec posse videretur; unde fertur quibusdam iratus dixisse : *Dico vobis, si possem vicem vobis reddidisse.* Quid non posset rex in subditos, dominus in servos, potens in infirmos, dux in milites? Sed quidquid non dictabat æquitas, quidquid veritati repugnabat, quidquid non permittiebat justitia, quidquid regiam mansuetudinem non decebat, sibi credebat impossibile. Ipse novum monasterium Wintoniæ fundavit, et mater ejus sanctissima femina Elswida monasterium virginum in eadem civitate construxit. Vixit autem rex Edwardus in regno viginti quatuor annis: et genuit filios et filias. Ex nobilissima femina Egwina filium suum primogenitum Adelstanum. Ex regina Aedgiva, Aedwinum, Edmundum, Edredum, et quatuor filias; quarum prima Edburga in Dei sponsam eligitur et consecratur. Altera ab Ottone Romanorum imperatore in matrimonium sumitur. Tertia ad Carolum regem Francorum ab eo duenda destinatur. Quartam rex Northanhymbrorum in matrimonium sortitur.

Ferunt quidam regem aliquando inter missarum solemnia factum in excessum mentis contra mortem suum risisse. Mirantibus qui aderant, et tempore opportuno causam sciscitantibus, sit rex : « Convenit Daeis et Northgensibus præ datum venire in Angliam. Congregata in portu magna navium multitudine, illatis quoque armis comportatisque cibariis navigaturis necessaria parabantur. Et jam navigandi tempus advenerat, jam ventis vela, velis naves fuerant committendæ, cum ecce unusquispiam de domo vicina portui cum calice pleno meda egrediens, proceres invitat ad potum. Rident illi, iustat ille. Tandem probrosum eis nomen si non vel semel biberent imprecatus, cunctos pellexit a navi. Dumque calix succederet calici, assiduitateque bibendi succenderetur aviditas, ebrietas in loquacitatem, loquacitas prorupit in litem, lis Dacos provocat et armat in pugnam. Fit tumultus

A inter convivas; dum cæca quadam amentia quisque in socium irruit, nesciens cui parceret, et quem feriret ignorans. Inter mutuas igitur cædes dum alii sternerentur, alii vulnerarentur, quidam fuga vitam reservant, quidam ascensis navibus maria secant, sieque dispersi omnes, ab intentione propositoque desciunt. Hæc risus meli causa, quoniam risum fecit mihi Dominus, et quicunque audiet corridebit mihi. Spero autem in Deo meo, quoniam temporibus meis Angliam alienigenæ non gravabunt. Cerne, quæso, regiam mentem quanta lux divinitus illustraverit; longe posita sensit, præsentia neglexit, et futura prospexit.

De rege Edelstano.

Dormivit autem cum patribus suis rex Edwardus, et regnauit Edelstanus filius ejus pro eo; ambulavitque in viis patrum suorum, non declinavit ad dextram neque ad sinistram; eamdem in Deo fidem, in subditos gratiam, circa ecclesias devotionem, circa pauperes misericordiam, circa Dei sacerdotes retinens reverentiam. Contra hunc reliquias Dacorum more suo nefandum erigunt caput, sed contriti sunt sub pedibus ejus et redacti in pulverem. Rebellaverunt ei Northumbri et Scotti, et fœdus quod cum eo pepigerant prævaricati sunt. Rex vero cum maximum congregasset exercitum, terra marique impios expugnaturos progreditur. Cum autem venisset in provinciam Lindisse, obviam habuit pauperum et medioerium turbam non modicam. Sciscitanti unde venissent, respondent de Beverlaco, ubi ad visitandas beati Joannis reliquias spe obtinendæ salutis advenerant. Quæsivit rex, si quem voti sui obtinuissent effectum: et unus illorum : *Ego, inquit, cœcus natus ad sanctissimi viri corpus lumen recepi.* Et alter : *Ego clavus ex utero matris sancti Joannis orationibus, ut ipse vides, sanus incedo.* Audiens autem hæc et his similia rex Christianissimus : *Magnus est, inquit, iste Joannes, et utile credo in hoc magno negotio tanti viri nobis conciliare gratiam et auxilium implorare.* Quoniam igitur fas non est talem nos regni nostri invisitatum præterire patronum, præcedat exercitus noster via regia, ego cum paucis sepulcrum ejus de quo tanta audio, ejus misericordiam invocaturus adire curabo. Veniens deinde ad sancti tumulum rex illustrissimus, post excubias more patrio celebratas, post orationes corde supplici fusas, cum pavimentum devotissimis lacrymis perfudisset, protractum e vagina cultellum sacris imposuit altaribus : *Ecce, inquiens, beatissime Joannes, sponsonis meæ vadimonium, ut, cum auxilio tuo subactis hostibus cum prosperitate rediero, digno illud pretio redimam, et quoad rixero, tibi gratus et devotus existam.* Revertitur deinde ad exercitum suum rex, et mox hostium fines potenter invadit. Et jam tempus advenerat præliandi, cum præcedenti nocte rex oppressus somno, sanctum Joannem sibi aspicit assistentem, et ut secure congrederetur hortantem : *Devotionem, inquiens, tuam*

quam circa sepulcrum meum exhibuisti, grataanter amplectens, orari pro te Deum meum, et exaudivit vocem meam. Observa igitur, et audi vocem meam; ut ambules in viis patrum tuorum, et inimicus ero inimicis tuis, et affigentes te affigam, et custodiz te gratia Dei. Hæc dicens, disparuit. Mane autem facto, rex in hostes irruit, potitusque victoria regem Scotiæ ad deditioinem coegit. Cumque situm terræ illius non parvo tempore explorasset, accepto obside regis filio, reversus est Eboracum. Inde tendens Beverlacum, cultellum suum multarum possessionum maximæque libertatis largitione redemit. Cum autem vixisset postea sexdecim annis regnando mortuus est; et regnavit Edmundus frater ejus pro eo.

De nobili rege Edmundo.

Erat autem patris Edwardi in omnibus imitator; homo *simplex* et *rectus*, et *timens Deum* (*Job 1*), et usque ad finem vitæ suæ permanens in innocencia sua. Promotus vero in regnum zelo zelatus est pro fide Christi, nimisque ægre ferens pagorum reliquias cultura idolorum regni sui fœdare decorum, quinque nobilissimas civitates, Lincolniam, Leicestriam, Stamfordiam, Snotingaham, De-rebt, quas eatenus incoluerant, de manibus eorum extorsit, omnique infidelitate abrasa Christianæ fidei lumine illustravit. Purgato autem ab alienigenis regno, et sibi in omni parte subjecto, monasteriorum et ecclesiarum maxime curam habuit, consilio sanctissimi Dunstani, et statuenda statuit, et corrigenda correxit. Hic Clasingberi beato Dunstano ut in monachorum habitationem fundaretur commisit, et multa alia bona, sancto Dunstano cooperante, disposuit. Cum igitur Anglia sub tanto patre magis quam rege pace magna et gloria floreret, immatura ejus morte, quam exactis in regno quinque annis et septem mensibus nefanda proditione incurrit, subito dolore et timore emarcuit.

De Edredo rege.

Successit ei in regnum frater suus Edredus, et ambulavit in viis fratris sui; beati Dunstani consiliis in omnibus obediens, et justissimis legibus subditos regens. Erat enim tantæ probitatis, ut rebellantes sibi Northymbros et Scotos facile vicerit, et in pristinam subjectionem sine magno labore redegerit. Hujus laudabilem vitam mors pretiosa conclusit. Cum enim ad regem ægrotantem beatus Dunstanus vocaretur, in ipso itinere audivit vocem angelorum in cœlo dicentium: *Rex Edredus nunc obdormivit in Domino.*

De Edwino rege.

Post quem suscepit regnum Anglorum Edwinus filius Edmundi regis, nec ambulavit iu viis patrum suorum, sed in sancta illa progenie novus quidam Herodes emersit, qui cujusdam Herodiadis mulieris, videlicet impiissimæ contra Deum, contra leges, contra ipsius jura naturæ adulterinis abutebatur amplexibus, et consilia nequissima sequen-

A batur. Nec defuit spiritus Joannis qui in sancto viro Dunstano et regem argueret adulterantem, et adulteram dignis invectionibus verberaret. Quæ Je-zabellito spiritu incitata nostri Eliæ moliebatur interitum, suisque voti sui compos si non sanctus præmunitus a Spiritu exsilium patriæ prætulisset. Rex vero cum hujus nequissimæ deceptus consiliis, nec juste, nec prudenter regnasset, maxima regni sui parte exxit, quæ mox ad fratrem ejus Edgaram transfertur. Tandem compunctus renuntiavit adulteræ, et consiliis sanioribus utebatur. Recordatus enim est Dominus patrum suorum regum, scilicet Christianissimorum, et ne quis de sacra illa stirpe periret, occasionem qua salvaretur invenit. Cum enim defunctus ab immundis spiritibus traheretur ad poenam, quidam dæmonum mortem ejus quasi de infelicitate persecutoris sui gavisuro sancto nuntiat Dunestano. Qui mox resolutus in lacrymas tam diu ante misericordem Jesum pro eo supplicans, et plorans procubuit, donec a dæmonibus liberatus veniam quam sanctus petiit obtineret.

De Edgardo rege pacifico.

Defuncto igitur rege Edwino, frater ejus Edgarus successit. Erat enim filius Edmundi nobilissimi regis, qui fuit Edwardi senioris Christianissimi principis, qui fuit Elfredi victoriosissimi ducis. Iste Edgarus cunctis prædecessoribus suis felicior, nulli sanctitate inferior, omnibus morum suavitate præstantior, quasi stella matutina in medio nebulæ, et quasi luna plena in diebus suis luxit. Iste Anglis non minus memorabilis quam Cyrus Persis, Carolus Francis, Romulusve Romanis. Hic enim regnum Anglorum cœlesti quadam pace composuit, et multarum linguarum gentes, unius fœdere legis conjunxit, unde ei cum Salomone commune vocabulum fuit, ut *Pacificus* quod Salomon interpretatur communis omnium voce diceretur. Nec mirum. Ipso enim nativitatis suæ tempore angelos concinuentes beatus Dunstanus audivit: *Pax Anglorum ecclesiæ hujus pueri qui nunc natus est tempore.* Sicut igitur aurora transactæ noctis tenebras radiis suæ claritatis depellit, ita hujus sanctissimi regis promotione per omnem Angliam nox infidelitatis expellitur, irarum et discordiarum tenebræ propelluntur. Tanta enim in verbis, in vultu, in moribus, interioris suavitatis indicia præferebat, ut, Deo cooperante, tota ei insula sine sanguine manus daret, et ad subdendum se ei Scotia, Cumbria, Wallia libens accurreret. Eo namque regnante sol videbatur esse serenor, maris unda pacatior, terra secundior, et totius regni facies abundantiori decore venustior. In diebus illius non tormentia, non crues, non exsilium, nec proscriptione, quantum boni principis vel levis timebatur offensa. Omibus igitur per Angliam in eundem dilectionis spiritum concurrentibus, rex in ecclesiis construendis et ornandis, in monasteriis fundandis et ditandis, curam et operam impendebat. Denique per regnum Anglorum quadranginta cœ-

strui fecit monasteria, et alia monachis, et alia virginibus deputavit. Clasingebiri quod pater ejus fundaverat ipse perfecit. Abbendune, Burch, Lornei, Rameseie, et Wiltune monasterium virginum magno studio condidit, multa diligentia illustravit. Hieme et vere infra regnum suum usqueaque per singulas provincias transire solebat, judicia, mores, actus ministrorum et principum diligentius explorare, quomodo legum jura et suorum statuta decretorum servarentur subtilius investigare, ne pauperes a potentibus præjudicium passi opprimerentur, sollicite præcavere. Præparaverat naves robustissimas, numero tria millia sexcentas; quibus redeunte æstate omnem insulam ad terrorem extraneorum, et ad suorum exercitationem cum maximo apparatu circumnavigare provincias consueverat. Inter hæc semper cum episcopis virisque doctissimis, de lege Dei et sacris litteris conferebat, et quod ipse discere poterat, subditos docere non solum verbo sed etiam exemplo satagebat. Cumque diligenter episcoporum, clericorum, monachorum, vitam et mores investigatione prudentissima didicisset, vocatis ad se ecclesiastarum et monasteriorum patribus, cum eis hujusmodi sermonem habuit.

Sermo regis Edgari ad clerum.

Quoniam magnificavit Dominus facere misericordiam suam nobiscum, dignum est, Patres reverentissimi, ut innumeris beneficiis illius dignis respondeamus operibus. Neque enim in gladio nostro possidemus terram, et brachium nostrum non salvavit nos, sed dextra ejus et brachium sanctum ejus, quoniam complacuit illi in nobis. Justum proinde est ut, quia omnia subjecit sub pedibus nostris, subjiciamus illi et nos animas nostras; et ut hi quos nobis subdidit, ejus subdantur legibus non segniter elaboremus. Et mea quidem interest laicus cum æquitatis iure tractare, inter virum et proximum suum justum judicium facere; punire sacrilegos, rebelles comprimere, eripere inopem de manu fortiorum ejus, egenum et pauperem a diripiéntibus eum. Sed et meæ sollicitudinis est, ecclesiastarum ministris, gregibus monachorum, choris virginum, et necessaria procurare, et paci eorum et quieti consulere. De quorum omnium moribus ad vos spectat examen; si vivunt continenter, si honeste se habent ad eos qui foris sunt, si in divinis officiis solliciti, si ad docendos populos assidui, si victus sobrii, si habitu moderati, si in judiciis sunt discreti. Pace vestra loquor, reverendi Patres, si ista solerti scrutinio curassetis, non tam horrenda et abominanda ad aures nostras de clericis perennissent. Taceo quod nec illis est corona patens, nec tonsura conveniens, quod in ueste lascivia, in gestu insolentia, in verbis turpitudo, interioris hominis loquantur insaniam. Præterea in divinis officiis quantitas negligentia, cum sacris vigiliis vix interesse dingenatur, cum ad sacra missarum solemnia ad ludendum magis quam psallendum congregari videantur. Dicam, dicam, quod boni lugent, mali rident; dicam

A dolens, si tamen dici potest, quomodo diffundunt in comensationibus et obrietatibus, in cubilibus et impudicitia, ut jam domus clericorum putentur prostibula meretricum, et conciliabulum histrionum. Ibi aleæ, ibi saltus et cantus, ibi usque ad medium noctis spatum protractæ cum clamore et horrore vigilæ. Sic, sic patrimonia regum, eleemosynæ pauperum, ino quod magis est! illius pretiosi sanguinis pretium profigatur. Ad hoc igitur exhauserunt patres nostri thesauros suos; ad hoc fiscus regius distractis redditibus multis detumuit; ad hoc ecclesiæ Christi agros et possessiones regalis munificentia contulit, ut deliciis clericorum meretrices ornentur, luxuriosa convivia præparentur, canes et aves ac talia ludicra comparentur? Hæc milites clament, plebs submurmurat, mimi cantant et saltant; et vos negligitis, vos parcitis, vos dissimulatis? Ubi gladius Levi et zelus Simeonis qui ut scorto abutentes filia Jacob Sichimitas, eorum habentes figuram qui Christi Ecclesiæ pollutis actibus fædant, etiam circumcisos succiderunt? Ubi spiritus Moysei qui caput vituli adorantibus etiam domesticis sui sanguinis non pepercit? Ubi pugio Phinees sacerdotis qui forniciatem cum Madianita confodiens, sancta hac æmulatione Deum placavit iratum? Ubi spiritus Petri cajus virtute perimitur avaritia, heresim Simoniaca condemnatur? Amulamini, o sacerdotes, amulamini vias Domini et justitias Dei nostri. Tempus faciendi contra eos qui dissipaverunt legem Dei. Ego Constantini, vos Petri gladium habetis in manibus. Jungamus dexteræ, gladium gladio copulemus, ut ejiciantur extra castra leprosi, ut purgetur sanctuarium Domini, et ministrent in templo filii Levi, qui dixi patri et matri: « Nescio vos; et fratribus suis: Ignoravos (Deut. xxxiii). » Agite, quæso, sollicite ne perireat nos sociisse quod fecimus, dedisse quod dedimus, si viderimus illud non in Dei obsequium, sed in pessimorum luxuriam impunita libertate consumi. Moveant vos sanctorum reliquiæ, quibus insultant: veneranda altaria, ante quæ insaniant. Moveat vos antecessorum nostrorum mira devotio, quorum eleemosynæ vesania clericorum abutitur. Proavis meus, ut scitis, totam terram suam ecclesiæ et monasteriis decimavit. Sanctæ memoriae atavus meus Aluredus ut ecclesiam ditaret, non thesauris suis, non patrimonio, non sumptibus, non redditibus parcendum patavit. Avus meus Edwardus senior quanta contulerit ecclesiæ vestram paternitatem non latet. Pater meus et frater ejus quibus donariis Christi altaria cumulaverunt meminisse vos decet. O Pater patrum Dunestane! contemplare, quæso, patris mei oculos ab illa lucida cali plaga in te radientes; audi querulas ejus voces cum quadam pietate in tuis auribus resonantes. Tu mihi, pater Dunestane, tu mihi de construendis monasteriis, de ecclesiæ ædificandis consilium salubre dedisti, tu mihi adjutor in omnibus et cooperator exististi: te quasi pastorem et episcopum animæ meæ, morumque meorum custodem elegi. Quando tibi non parui? Quos unquam thesauris tuis

consiliis prætuli ? Quas possessiones te præcipiente non sprevi ? Si quid pauperibus dandum existimabas, præsto fuit. Si quid conferendum ecclesiis judicabas, non distuli. Si quid monachis clericis deesse quererabis, supplici. Aeternam dicebas esse eleemosynam, nec aliam fructuosiorum quam que monasteriis ecclesiisve consertur, qua et Dei servi sustentantur, et quod superest pauperibus erogatur. O præclara eleemosyna ! o dignum pretium animæ ! O peccatis nostris salubre remedium, quod a sinu Sibille in peregrini muris pellicula fetet, quod aures ejus ornat, quod componit digitulos, quod corpus dedicatum in bysso stringit et purpura. Hiccine est eleemosynarum mearum fructus ? Hiccine est desiderit mei tuæque promissionis effectus ? Quid huic patris mei querimoniae respondebis ? Scio, scio. Cum videbas surem, non currebas cum eo, nec cum adulteris portionem tuam ponebas. Arguisti, obsecrasti, incrépasti. Contempta sunt verba : veniendum est ad verbera. Habes hic tecum venerabilem patrem Edelwaldum Wintoniensem episcopum, habes reverentissimum præsidem Vigorniensem Oswaldum : vobis istud committo negotium, ut episcopali censura et auctoritate regia turpiter viventes de ecclesiis ejiciantur, et ordinante viventes introducantur.

Scientes igitur beati præsides manum regis bonam secum, ab ecclesia Wintoniensi, Wigorniensi pluribusque aliis inhoneste viventes expulerunt, introducentes viros religiosos, qui novo quodam splendore universam insulam illustrarunt. O vere tunc beata Anglorum ecclesia, quam innumerabilem monachorum et virginum adornabat integritas, quam devotione plebium, moderatione militum, æquitas judicum, terræ secunditas lætificabat ! Exsultabat rex beatissimus suis temporibus ordinem suum rerum omnium invenisse naturam, cum homines Deo, terra homini, cœlum terræ, justitia, fructu, acrum temperie debitum præstaret officium. Et ut noverimus quanta eum Deus, etiam in hac vita, bonorum operum mercede donaverit, cum aliquando ad maximam ejus festivitatem reges, comites multarumque provinciarum proceres convenissent, quadam die naves jussit parari, gratum habens ecclesiam Beati Joannis Baptiste orationis obtentu navgio petere. Cum igitur comitibus et satrapis naves plurimas delegasset, ipse cum octo regibus sibi subditis navem unam intravit ; ad octo autem remos regibus totidem collatis, ipse in puppe sedens gubernatoris officio fungebatur. Dici sane non potest cum quanta gloria, cum quibus divitiis celebrata est illa festivitas, cum viderentur ipsa elementa ejus nutui deseruire, quem creatoris sui cernerant cum maxima devotione imperiis obedire ; sed heu ! nihil in terrenis æternum, nihil in caducis stabile, nihil in mortalibus immortale. Translato enim ad cœlestia regna rege Aedgaro, in regno terreno filius ejus Edwardus successit, qui injuste ab impiis interfactus, tum ob vitæ sanctitatem, tum ob

A mortis acerbitatem sancti nomen et meritum Deo donante promeruit.

De rege Ethelreao.

Cui frater ejus Edelredus, filius scilicet Edgari et reginæ, in regnum successit, et a sancto Dunestano aliisque Anglorum episcopis inungitur et consecratur. Qui a beato Dunestano tale fertur accepisse oraculum : *Quoniam Angli in sanguinem fratris sui regis sanctissimi conspiraverunt, non deficit ab eis sanguis et gladius, donec supervenient populus ignotæ lingue eos in exterminium et in ultimam redigat servitutem. Novissime tamen visitabit eos Dominus.* Regnante igitur rege prædicto, Daci supervenientes magnam terræ partem igne ferroque vastaverunt. Tunc rex missis in Normanniam nuntiis Emmam filiam Richardi ducis sibi in uxorem dari et petiit, et accepit, cum jam de filia Torethi nobilissimi comitis filium suscepisset Edmundum. Ex Emma deinde duos habuit filios, Edwardum et Alfredum, de quibus postea dicemus. Tunc rex fortior solito, omnes per Angliam Dacos una die eademque hora missis epistolis jussit interfici. Quod Daci transmarini audientes in furorem versi, duce Suano cum innumerabili exercitu Angliam intrantes, diffusi sunt per provincias et dispersi, non ordini, non sexui, non ætati parcentes, nec ab ecclesiis vel monasteriorum sacris et sanctuaris manus sacrilegas contiuentes. Quibus cum rex strenuissimus sæpius restitisset, proditione tandem eorum factus inferior, reginam cum puerulis suis Normanniam misit, quos ipse postmodum exutus regno seculius est. Sed Suanus Dacus vel subita morte præventus, vel a sancto Edmundo invisibili poena percussus, cum apud inferos crudelitatis suæ stipendia receperisset, revocatus ab Anglis Edelredus regni influis sublimatur, et iterum contra Dacos virtute potens erigitur. Contra quem Cuuth filius Suani rex Dacorum paternum odium exercere non desit. Edelredus autem euin laboriosissime sed strenuissime regnasset triginta et septem annis, Lundonii obiit, Edmundum filium suum laboris et regni relinquens heredem.

De rege Edmundo, cognomento Ferreo latere.

De cuius mirabili fortitudine quidquid dicerem minus esset ; unde ob invincibile robur corporis Prensyde, id est Ferrei lateris, nomen accepit. Sagitta ejus nunquam abit retrosum, et gladius ejus non est reversus inanis. Contra hostes leoninæ feritatis, erga suos columbinæ simplicitatis ; quo nemo fortior, sed quo nemo suavior, quo nullus audacior, sed quo nemo cautior ; quo in adversis nemo securior, sed quo in prosperis nemo temprantior. Porro Dani, et qui a rege desecrarent Angli, Cnuthum sibi in regem elegerunt, sed strenuissimus rex Edmundus cum exercitu suo sicut leo rugiens terram circuiens, regiones plurimas quas occupaverat Cnuth in deditiōnem nullo obsidente recepit ; verum quoniam cum eo pugnaverit, quoties

ejus fugaverit exercitum, quoties vocatam a partibus transmarinis validam manum cum paucis, inopere solus prostraverit, quoties denique nefandam gentem exterminasset, et in nihil redegisset, nisi quidam patriæ proditores obstiissent, nimium est huic operi inserere; cum non dico meus, sed et Virgilianus, vel etiam Homericus sub tanta materia sensus deficeret. Sæpissime enim convenientibus cum magno exercitu utrisque regibus in pugnam, vel Edmundus semper vicit vel nullus. Nonnunquam quippe a mane usque ad vesperam Marcio campo certantes, cum Cnuth multitudine, viribus præstaret Edmundus, irruentibus tenebris cæcis utrinque innumerabilibus sine victoria recedebant, ad similem ludum eumdemque exitum die crastina reversuri. Pertæsus tandem uteque exercitus, cum viderentur quotidie vires Edmundo, numerus ex partibus transmarinis accrescere Cnutho, quiet hoc ipsum sibi timens astute machinabatur, utriusque proceres ad colloquium cogunt. Inter quos cum quidam cæteris major natu surrexisset, dari sibi silentium postulavit.

Cupio, inquiens, o viri cordati, his periculis nostris præbere consultum; qui quidem vobis sapientia minor sum, sed ut haec rugæ et hi cani testantur, ætate superior; et forte quod ingenium non habuit, usus docuit; et quod negavit scientia, contulit experientia. Multa certe vidimus et cognovimus, multa insuper patres nostri narraverunt nobis, et non immерito exigimus audientiam, ut de certis et apertis non dubiam proferamus sententiam. Periculosa res agitur; mala palimur, pejora cernimus, pessima formidamus. Quotidie pugnamus nec vincimus, sed nec vincimur, imo vincimur et nemo vincit. Quomodo enim non vincimur, qui vulnerati, qui oppressi, qui satigati, qui viribus destituti, qui armis spoliati; nec sumus cum non sit qui impetu, nec impetus cum utrinque virtus deficiat? Usquequo finis horum mirabilium? quando ab hoc labore requies, ab hac tempestate tranquillitas, ab hoc timore securitas? Invincibilis est certe Edmundus ob mirabilem ejus fortitudinem. Invincibilis et Cnuth propter fortunæ favorem. Nos conterimus, nos jugulamur, nos dissipamur, nos amittimus pignora dulcia, nos suaves necessitudines morti exponimus. At hujus laboris quis fructus, quis finis, quod pretium, quod emolumen-tum; quod, quæso, nisi ut cæsis utrinque militibus duces compulsi necessitate componant, vel certe soli sine milite pugnant? Quare non modo? Certe dum vivimus, dum spiramus, dum superest exercitus, id ageretur utilius, honestius, securius. Rogo quæ est ista ingentia, imo violentia, imo insanus? Anglia quondam multis subjecta regibus, et gloria floruit, et divitiis abundavit. O ambitio! quam cæca semper, quæ totum cupiens totum amittit! Quare, rogo, non duobus sufficit quod quinque olim regibus satis fuit? Quod si eis tanta inest dominandi libido, ut Edmundus parem, Cnuth dedignetur superiorem; pugnant, quæso, soli qui soli cupiunt dominari, certent pro-

A corona soli qui soli cupiunt insigniri. Ineant ipsi duci-duces duelli discrimen, ut vel sic alter vincatur, ne si sæpius pugnant exercitus, omnibus intersectis non sint quibus imperent milites, non sint qui adversum extraneos regnum defendant.

Parante illo adhuc plura proferre, in mediis, ut ita dicam, saucibus totus ei populus verbum obcludit, vociferans et dicens: *Aut pugnant ipsi aut componant.* Delataam ad ipsos sententiam procerum reges probant. Convenientibus itaque utrisque cum exercitu suo super ripam Sabrinæ fluminis, Edmundus cum suis in occidentali, Cnuth cum suis in orientali ripa consedit. Est autem insula in ipsius fluminis medio sita quæ Holenghe appellatur, ad quam reges transvecti splendidissimis protecti armis utroque spectante populo incunt singulare certamen. At ubi hastarum robur tam virtute impingentium quam fortissimorum objectu clypearum deperiit, extractis gladiis, sese minus impetunt. Pugnatum est acriter dum Edmundum virtus, Cnuth fortuna juvaret; circa galeata capita gladii tinniunt, collisione metallorum scintillæ prorumpunt; ubi vero robustissimum illud pectus Edmundi ex ipso ut assolet bellandi motu ira incanduit, sanguine incalescente fit robustior, dexteram elevat, vibrat ensem, ac tanta vehementia in caput obstantis ictus iterat, ut spectantibus non tam percutere quam fulminare videretur. Ad singulos enim ictus inter ensem et galeam ignis erumpens, non modo apparere sed insuper accendere videbatur. Sentiens autem Cnuth breviori halitu sibi vires decere, cogitat de pace juvenem convenire; sed ut erat astutus, timens ne si defectus suus innotesceret juveni, pacis verbum nec audiret quidem; totum intra se colligens spiritum, et quidquid habuit vi-rium omni conatu intendens, virtute mirabili uno impetu irruit in Edmundum, et mox se paululum retrahens rogit juvenem subsistere modicum, et sibi dicere volenti præstare auditum.

Ille ut erat suavis animi, demissa ad terram scuti parte inferiori, leniter in superiori procubuit, ac supinato in dextera gladio ad verba loquentis atten-dit. Tunc Cnuth: *Huctenus, inquit, regni tui cupidus, nunc, virorum fortissime, tu certe ipsis cupidior sum, quem non dico regno Anglorum, sed universo utique orbi video præferendum. Mihi Dacia cessit, mihi succubuit Norwegia, mihi rex Suavorum manus dedit, et mei conatus impetum quem nullum mortaliū sustinere posse credebam, tua mirabilis virtus jam plus semel elusit. Quocirca, licet me ubique victorem futurum fortuna promiserit, ita tamen me tua mirabilis probitas illexit ad gratiam, ut supra modum te et amicum cupiam et regni consortem exceptem; utinam et tu mei cupidus sis, ut ego tecum in Auglia, tu mecum in Dacia regnes!* Certe si fortunæ meæ tua virtus accesserit, pavebit Norwegia, tremebit Suavia, ipsa assueta bellis Gallia trepidabit. Quid plura? Annuit Edmundus et Cnuth de regni divisione consentit. Cessit enim verbis qui non cesse-

rat gladiis, et oratione flectitur qui armis fleti non A poterat. Depositis itaque armis, in oscula ruunt, utroque exercitu exultante, clero etiam *Te Deum laudamus* clara voce personante. Deinde in signum fœderis vestem mutant et arma, reversique ad suos modum amicitiae pacisque præscribunt, et sic cum gaudio ad sua quisque revertitur. His ita gestis, quidam proditor partis Danicæ volens se gratum Cnutho præstare, regi Edmundo molitur insidias. Nec opportunum quo regem occideret locum inveniens, nefandissimum ac turpissimum insidiarum excogitat genus. Sub purgatoria namque domo sese occultans, regem ad requisita naturæ nudatum inter celanda percussit, relictoque ferro scelestissimus ac turpissimus homicida confugit. Stansque ante regem Cnuthum : *Salve, inquit, rex solus.* Sciscitanti cur eum tali salutatione salutasset, rem intulit. Cui rex : *Quoniam, inquit, me tali obsequio gratificandum putasti, sustollam caput tuum super omnes proceres Angliae.* Jussitque abscidi caput eius et in sublimiori porta Lundoniæ suspendi. Mortuus est itaque strenuissimus rex Edmundus et in Clasingebiti cum avo suo Edgardo sepelitur. Volens deinde Cnuth tam fratres Edmundi qui in Normannia exsulabant quam filios ejus puerulos Edmundum et Edwardum spe regni penitus privare, jubet adesse summos regni proceres quæritque ab eis quæ fuerit inter ipsum et Edmundum in regni divisione conventionis, quem scilicet sibi designaverit rex Edmundus hæredein, quem filii adhuc infantibus custodem deputaverit, quid de fratribus suis Aluredo et Edwardo præceperit. At illi ut regi placarent mendacium præferunt veritati, oblitique justitiae oblitique naturæ insurrexerunt in innocentes testes iniqui, et mentita est iniurias sibi. Itaque proprii sanguinis proditores dicunt regem Edmundum sibi potius curam regni filiorumque suorum delegasse, cum ipse fratres suos hæredes designaverit et eis puerorum custodiam deputaverit. Quoniam igitur adulantes regi mentiti sunt in caput suum, gladius eorum intravit in corda eorum, et a Cnutho quem alienigenam naturalibus dominis prætulerunt, contractus est arcus eorum. Cum enim monarchiam insulæ fæventibus illis obtinuisse, omnes qui primi in illo fuere consilio exterminavit, et quotquot de regio semine superstites reperit, vel regno pepulit vel occidit. At puerulos filios Edmundi ferire metuens præ pudore, ad regem Suavorum eos interficiendos transmisit. Rex vero Suavorum nobilium puerorum miseratus ærumnam, ad Hungariorum regem eos destinat nutriendos. Quos ipse benigne accepit, benignius fovit, benignissime sibi in filios adoptavit. Porro Edmundus filiam suam dedit uxorem; Edwardo filiam germani sui Henrici imperatoris in matrimonium junxit. Sed paulo post Edmundus de temporalibus ad æterna transvertitur: Edwardus sospitate et prosperitate fruatur.

B *De sancto Edwardo rege confessore ac virgine.*
Interea mortuo Cnuth et filiis ejus qui regnaverunt post eum, accersitur ad regnum Anglorum Edwardus' frater Edmundi, filius Edelredi qui, sicut diximus, in Normannia exsulabat. Nam frater ejus Alfredus proditione, ut putatur, Godwini in Anglia crudeli morte perierat. Veniens igitur in Angliam Edwardus ab universo clero et populo cum maxima exultatione suscipitur, et Wintoniæ die sancto Paschæ ab archiepiscopis Cantuariensi et Eboracensi cunctisque fere regni episcopis in regem ungitur et consecratur, et ambulavit viis patriæ sui Edgaro, homo mansuetus et pius, magis pace quam armis regnum protegens, habebat animum træ victorem, avaritiae contemptorem, superbiae experitem. Qui cum pacem tam a suis quam ab extraneis obtinuisse, et vicinis regibus et principibus gratus et amabilis exstitisset, dirigit nuntios ad Romanum imperatorem, rogans, ut nepotem suum scilicet, filium fratri sui Edmundi ferrei lateris, debiti sibi regni futurum hæredem mittere dignaretur. Imperator autem regis nuntios grataanter excipiens, non parvo tempore summo cum honore detinuit. Tandem paratis navibus et omnibus quæ navigaturis necessaria videbantur allatis, Edwardum eum uxore sua Agatha germani sui filia liberisque ejus, Edgardo Edeling, Margaretæ atque Christina, cum magna gloria ac divitiis sicut rex petierat ad Angliam mitti. Qui prospero cursu in Angliam veniens, tam regem quam populum suo lætiticabat adventu. Sed post paucos dies vita discedens, gaudium in luctum, risum mutavit in lacrymas. Nec multo post ipse rex cum nobile monasterium quod in occidentali parte Lundoniæ in honore beati Petri fundaverat cum maxima gloria dedicari fecisset, exactis in regno viginti tribus annis et mensibus sex et viginti septem diebus, in vigilia Epiphaniæ felici morte vitam laudabilem terminavit, totamque insulam lacrymis ac dolore replevit. Quo in prædicto monasterio ut tantum virum decebat tumulato, quidam Edgarum Edeling cui regnum jure hæreditario debebatur, regem constituere moluntur. Sed quia puer tanto honore minus idoneus videbatur, Haraldus comes de genere proditorum, cuius erat et mens astutior et crumena secundior et miles copiosior, sinistro omni regnum obtinuit.

C *Quomodo rex Willielmus successit Haraldo.*

Audiens namque Willielmus dux Normannorum nullum de regio semine, sed Haraldum consobrini sui regis Edwardi regnum invasisse, quod ei et jure consanguinitatis et antiquæ inter ipsum et Edwardum conventionis, sed et ipsius Haraldi cum sacerdoto sponzionis justius debebatur, contracto a partibus transmarinis innumerabili exercitu in Angliam venit, et Dei iudicio ipsum Haraldum regno simul et vita privavit. Cernens autem Edgarus Edeling res Anglorum undique perturbari, ascensa nave cum matre et sororibus reverti in patriam quæ natus fuerat conabatur, sed orta in mari tempestas

in Scotia applicare compellitur. Hac occasione actum est ut Margaretæ regis Malcolmi nuptiis traheretur, cuius laudabilem vitam et mortem pretiosam liber inde editus satis insinuat; soror ejus Christiana in Christi sponsam benedicitur. Cujus sane cordis fuerit rex iste Malcolmus, unum ejus opus quod nobili rege David referente cognovi, legentibus declarabit. Delatum est ei aliquando quemdam de suis proceribus summis de eo occidendo cum suis hostibus convenisse: imperat rex delatori silentium, siluit et ipse, proditoris qui fortia ^{hic} abierat exspectans adventum. Qui cum ~~peccatum~~ cum magno apparatu regi insidiaturus ~~venientem~~, jubet summo mane rex omnes venatores alesse cum canibus. Et jam aurora noctem abegerat, cum rex vocatis ad se cunctis proceribus et militibus, venatum ire festinat, venitque ad latam quamdam planitiem quam in modum coronæ densissima silva cingebat. In cuius medio colliculus quidam quasi turgescere videbatur, qui diversorum colorum floribus pulchra quadam varietate depictus, fatigatis venatu militibus gratum singulis diebus præbebat accubatum. In quo rex cum cæteris superior constitisset, secundum legem venandi quam vulgus tristam vocat, singulis proceribus cum suis canibus singula loca delegat, ut obsessa undique bestia ubicunque eligeret exitum, inveniret exitum. Ipse vero suum secum retinens proditorem secessum ab aliis solus cum solo abcessit. Ab omnium vero remotus aspectu, substitut rex, et aspiciens in eum: *Ecce, inquit, ego et tu mecum solus cum solo, similibus protecti armis, equis recti similibus. Non est qui videat, non est qui audiat, non est qui alteri nostrum suffragium ferat; si igitur vales, si audes, si cor habes, imple quod proposuisti, reddi hostibus meis quod promisisti; si me occidendum putas, quando melius, quando securius, quando liberius, quando tandem virilius? An venenum parasti? sed muliercularum hoc est, quis nesciat? An insidiaris lectulo? hoc possunt et adulteræ. An ferrum ut occulite ferias occultasti? hoc sicariorum, non militis est, nemo est qui dubitet. Age potius quod militis, age quod viri, et solus cum solo congregere, ut saltem proditio tua turpitudine careat quæ infidelitate carere non poterat.* Hactenus vix ille sustinuit, et mox verbis ejus quasi gravi percussus fulmine de equo corruit, projectisque armis ad pedes regios cum lacrymis ac tremore cucurrit. Cui rex: *Noli, inquit, timere, nihil a me patieris mali.* Qui cum ei de cætero fidelem se et amicum præstito sacramento nominatisque obsidibus promisisset, tempore opportuno revertuntur ad socios, quæ fecerant vel dixerant nulli loquentes. Sed ad propositum revertamur. Nati sunt reginæ Margaretæ sex filii et duæ filiæ. Quorum tres, Edgarus scilicet, Alexander, et generis sui splendor David, reges fuerunt. Edgarus homo erat dulcis et amabilis, cognato suo regi Edwardo per omnia similis, nihil tyrannicum, nihil durum, nihil avarum in suos exercens, sed cum maxima charitate et be-

A nevolentia subditos regens. Porro Alexander clericis et monachis satis humilis et amabilis erat, cæteris subditorum supra modum terribilis, homo magni cordis, ultra vires suas se in omnibus extensis. Erat autem litteratus, et in ordinandis ecclesiis, in reliquiis sanctorum perquirendis, in vestibus sacerdotalibus librisque sacris conficiendis et ordinandis studiosissimus, omnibus advenientibus supra vires liberalissimus; circa pauperes vero ita devotus ut in nulla re magis delectari, quam in eis suscipiens, lavandis, alendis vestiendisque videtur.

Quid vero de rege David sentiamus in descriptione præmissa utcunque digessimus. Horum soror Mathildis glorioissimo regi Anglorum nupsit Henrico. De cujus admirabili gloria animique virtute, quæcumque fuerit in officiis divinis sacrisque vigiliis assidua ac devota, in tanta insuper potestate quam humilis, qui scribere voluerit, alteram nobis Esther nostris temporibus declarabit. Quod nos facere omisimus et propter materiæ magnitudinem, et propter harum rerum minorem adhuc cognitionem; unum tamen illius referam opus quod ex ore sæpe nominandi et nunquam obliviscendi David regis audivi, per quod qualis fuerit circa pauperes Christi, satis, ut arbitror, elucescat. Cum, inquit, *adolescens in curia regia servirem, nocte quadam in hospitio meo cum sociis meis nescio quid agens, ad thalamum reginæ ab ipsa vocatus accessi. Et ecce domus plena leprosis et regina in medio stant, depositoque pallio cum ee linteo præcinxisset, posita in pelvi aqua cœpit lavare pedes eorum et extergere, extersosque utrisque constringere manibus et devotissime osculari.* Cui ego: « Quid agis, inquam, o domina mea? Certe si rex sciret ista, nunquam os tuum leprosorum pedum tabe pollutum suis dignaretur labiis osculari. » Tunc ipsa subridens: « Pedes, ait, Regis æterni quis nesciat labiis regis morituri esse præferendos? Ego certe idecirco vocavi te, frater charissime, ut meo exemplo talia discas operari; sumpta prouinde pelvi fac quod me facere intueris. » Ad hanc vocem vehementer expavi, et nullo modo id me posse respondi. Necdum enim sciebam Dominum, nec revelatus fuerat mihi spiritus ejus. Illa igitur cœptis insidente, ego mea culpa rite ns ad socios remeavi. Soror hujus beatissimæ, Maria nomine, Eustacio Boloniensi comiti traditur in uxorem. De hac igitur excellentissima et Christianissima regina nata est Mathildis, quæ primum imperatori Romano, deinde nobilissimo Andegavensem comiti nupsit Gausfrido. De Maria vero orta est Mathildis quæ nupti traditur tunc comiti Mauritanæ, nunc vero regi Anglorum Stephano. Porro rex David, tridente rege Henrico, uxorem duxit Mathildam filiam Wallevi comitis et Judithæ quæ fuit nepitis primi regis Willielmi, de qua suscepit filium Henricum virum mansuetum et pius, hominem suavis spiritus et lactei cordis, et dignum per omnia qui de tali patre nasceretur. Cum quo ab ipsis cunabulis vixi et puer cum puero crevi, cuius etiam adolescentiam

adolescens agnovi, quem juventutis flores pulsantem sicut patrem suum quem præ cunctis mortaliibus dilexi, jam senili flore fulgentem, ut Christo servirem, corpore quidem, sed nunquam mente vel affectu reliqui. Hæ sunt autem quæ adhuc supersunt de hac sancta generatione reliquiae. De imperatrice Mathildi tu, vir splendissime, quem nunc Normannorum et Aquitanorum ducem Andegavensem comitem, Angliæ vero gaudemus hæredem. Fratres etiam tui Gausfridus et Willielmus, de quibus bona speramus, quibus etiam bona optamus. De regina Mathildi et pio rege Stephano Willielmus, Guarenniæ et Boloniæ comes. De Henrico Malcolmus, Willielmus et aviti nominis hæres David. Quorum infante misereatur Deus, miserearis et tu, quem totius generis tui caput nobilissimum pietas divina constituit.

*Explicit liber bonæ memorie A. abbatis de Rievale de prosapia regis
Henrici editus.*

A tuit. Sit tuus super eos pius aspectus, dulcis affectus, et in quibuscumque tui indigerint operis effectus. Tibi enim ab avo suo, qui te præ cunctis dilexit hominibus, derelicti sunt orphani, pupilli tui eris adjutor cui est et ætas robustior, et manus validior, et sensus exercitatiōr. Ego autem in calce libri obsecro Deum meum, ut ex munere misericordia ejus tales tibi sint mores, actus tam sancti, vita tam casta, mens tam libera cupiditatis, tam expers superbiae, tam crudelitatis ignara, erga pauperes tam humilis et jucunda, circa Dei cultum tam devota, ut habeamus aliquid æterna memoria dignum quod ministerio litterarum de te ad posteros transmittamus. Omnipotens Deus conservet in te et augeat gratiam suam, excellentissime et illustrissime domine.

VITA S. EDWARDI REGIS ET CONFESSORIS AUCTORE BEATO AELREDO.

(TWISDEN ubi supra, pag. 369.)

PROLOGUS.

Multis veterum studio suis didicimus, illustrium virorum qui suis floruere temporibus actus vitamine describere, styloque illorum perpetuare memoriā, quorum beatitudo perpetua putabatur. Sed et plurimum posteris profuturum arbitrabantur, si nec eos laterent, qui essent imitandi. Nihil enim magis ad æmulationem perfectionis animum humanum provocat et accendit, quam quorumlibet perfectorum legere vel audire virtutes, mores ad discere, gloriam estimare; cum impossibile sibi nullus beat arbitrari, quod alium fecisse cognoverit; nec possit hæsitare de præmio si bene vixerit, legerit assecutum. Hinc est quod Dominus ac Salvator noster ex quo mundus salutarem suscepit fidem, inter multos insirmos quosdam voluit esse perfectos, quorum industria alii traherent ad fidem, vel ad mores optimos incitarentur. Ita usque ad hæc infelia tempora in quibus crebrescant vitia, et rarescunt virtutes, semper pro partibus tales nati sunt filii, doctrina quorum indocti quique instruerentur, auctoritate fulcirentur, informarentur exemplo. Verum præ cunctis civitatibus regnisve terrarum, de sanctitate regum suorum Anglia gloriatur, quorum alii coronati martyrio,

B de terreno ad cœleste regnum migraverunt; allii exsilio patriæ præferentes, mori pro Christo per gre delegerunt; nonnulli posito diademe, disciplinis se monasticis subdiderunt; quidam in justitia et sanctitate regnantes, prôdesse subditis quam præesse maluerunt. Inter quos velut sidus eximium gloriosus rex Edwardus emicuit, qui quasi stella matutina in medio nebulae, et quasi luna plena in diebus suis luxit. Hujus vitam miraculis insignem, a mea parvitate, jubente venerabili patre Laurencio Westmonasterii abbate, utcunque litteris traditam, tibi, gloriissime rex Henrice, credidi destinandam, ut scias quanti sit apud Deum meriti, cum quo regnat in celis, quem tuis temporibus te regiam auctoritatem præbente, sancta mater Ecclesia sublimius extollendum judicavit in terris. Imitanda enim est tanti regis tanta justitia; mirari dulce est in tot divitias et deliciis tanta continentia: de sancta ejus progenie traxisse carnis originem, Henrici nostri specialis est gloria. Ipsum te nobis in totius Angliæ consolationem credimus promisisse, ipsum te prophética parabola jam in extremis agentem didicimus designasse, in quem velut lapidem angularem Anglii generis et Normannici gaudemus duos par-